



Ioh. Sascerides

De

Littera et Spiritu.

Hafniæ 1589.




Early European Books, Copyright © 2009 ProQuest LLC.
Images reproduced by courtesy of the Royal Library, Copenhagen.
LN 1442 8° copy 1





Early European Books, Copyright © 2009 ProQuest LLC.
Images reproduced by courtesy of the Royal Library, Copenhagen.
LN 1442 8° copy 1



Early European Books, Copyright © 2009 ProQuest LLC.
Images reproduced by courtesy of the Royal Library, Copenhagen.
LN 1442 8° copy 1



Early European Books, Copyright © 2009 ProQuest LLC.
Images reproduced by courtesy of the Royal Library, Copenhagen.
LN 1442 8° copy 1


3. - 4. - 4^o

LN 1442

ex 1

M





3.

THESES
DE LITTERA,
ET SPIRITU, QVAS DIE

21. Iunij defendet honestus, & studiosus

Iuuenis OTTO STEPHANVS

ISLANDVS,

Præside

IOHANNE SASCERIDE.

Rom. 2. 26. 27.

Non qui in manifesto Iudæus est, nec ea, quæ manifestè sit in carne circumcisio (s. Deo probatur.) sed in occulto Iudæus, & circumcisio cordis in Spiritu, non littera, cuius laus non ex hominibus est, sed ex Deo.

Rom. 7. 6.

Nunc autem soluti sumus à Lege, mortui ei, in quo detinebamur: vt seruiamus in nouitate Spiritus, & non in vetustate litteræ.

2. Cor. 3. 6.

Qui idcirco fecit nos ministros Noui Testamenti, non litteræ, sed Spiritus: littera enim occidit, Spiritus autem viuificat, &c.

Esa. 29. 11.

Estq; vobis omnis visio, sicut verba libri clausi: quem si dederint scienti litteras, dicendo: Lege hunc, dicet: Haud possum, quia clausus est: si autem datus fuerit liber nescienti litteras, vt legat is eum, dicet: sum ignarus litterarum, &c.

H A F N I A E

Excudebat Matthias Vinitor.

1589.



De Littera, & Spiritu.

1. Cum interna, veræq; pietatis fons ex notitia Spiritus, & Littera scaturiat, discerniq; hinc demum evidenter à mendacio veritas incipiat: adeoq; non tantum olim D. Paulus, & paulo post b. Augustinus, pluresq; alij, sed & hoc nostro sæculo docti multi diligenter hunc locum theologicum explicuerint, etiam nos hoc tempore de eo paucis, divinum S. Spiritus implorantes auxilium, agere constituimus.

*Primaria res in
omni iustitia mentium*

2. Vocamus autem litteram hinc initio, dum propriè loqui volumus, non modò sensum grammaticum in Scripturæ sacræ ceremonijs, & historijs aliquot apparentem, sed quamcumq; doctrinam, & scientiam externam cum legis, tum Euangelij, simulq; cogitationes, assuefactiones, disciplinam, conatum, & intentiones quasvis absq; Spiritu sancto novos, & sanctos in mentibus fidelium excitante motus.

3. Econtrà per Spiritum intelligimus hinc non allegoricam interpretationem ceremoniarum, & historiarum in Scripturis Prophetis, & Apostolicis, sed arcam vim, & operationem Spiritus sancti verè nos docentis, vivificantis, & sanctificantis, ut fiamus nova creatura, nova præditi Luce, sapientia, iusticia, vitæq; æterna, quæ Deo placeat, & ardeat Spiritus sancti motibus, timore, fide, inuocatione, spe, patientia, dilectioneq; & similibus.

4. Ut igitur in his apertè Spiritum vivificare testamur, ità litteram intellectam hoc modo, cum Apostolo dicimus, occidere, nempe non tantum homines in morte relinquere, non vivificare, & regenerare ad vitam æternam (quia Spiritus

Spiritus sancti solius hoc proprium est) sed etiam eos, dum
ulterius nihil desiderant, efficere magis in carne, peccatoq;
& morte securos, inflatos, & obstinatos.

5. Nam pro qualitate Seminis, quod quis in se concepit,
etiam fructum ei conuenientem producit: vt apertè conspi-
cimus non tantum in omnibus arboribus, fruticibus, & her-
bis passim obujs, verum & in diuersarum specierum ani-
malibus, omnia naturam sui seminis ordinatione diuina rea-
praesentare.

6. Quare, si quis etiam è verbo diuinitus patefacto nihil
aliud animo suo concepit, quàm nudam litteram, hoc est,
quàm sensum humanum, tenebrosum, obscurum, terrenum,
& mortiferum, cui nulla Spiritus Lux, aut veritas ad-
iuncta sit, certè fructus quoq; inde proueniens, cognitio scia-
licet, & pietas eius animi, tum neutiquam poterit esse diui-
na, lucida, caelestis, Deo placens, aut salutaris, & viui-
fica.

7. Quanquàm enim verbum Dei sua natura, quatenus vi-
delicet ex mente Dei profluxit, est reuera Spiritus, & vita
(Iohan. 6. 63.) tamen, quoniam verbis homini caeco, pra-
uòq; vsitatis prolatum est, adeòq; intellectum eius, quasi ve-
stem quandam induit, pronè fit, vt quotquot illud, non re-
nati, sensu percipiunt humano citra Spiritum sanctum, ve-
stitu solo eius, non ipso, percepto, confidentiores facti, magis
morti, quàm vnquam prius, agglutinati deprehendantur.

8. Vnde, licet aliqui sint in cætu vocatorum, & aus-
diant, discant, confiteantur, vitæq; exprimere laborent ve-
ram doctrinam tum Legis, tum Euangelij, si tamen ydem

carent noua Luce, nouaq̃ è Spiritu sancto natiuitate, manent auulsi à Deo, & oppressi ira Dei, morteq̃ aeterna:
= Nam, qui non habet Spiritum Christi, non est eius, Rom. 8. 9.
9. Verum, qui Christi Spiritum in animo suo uiuentem,
& operantem habent, etiamsi forsan extrinsecus iudem non
= vsq̃ adeò speciosis actionibus refulgere cernuntur, dum tamen,
peccatis contra conscientiam, Spiritum sanctum, &
fidem non excutiunt, omninò Deo placent, & sunt haeredes
vitæ aeternæ, suntq̃ Templum Dei sanctum, & spirituale:
Quicumq̃ enim Spiritu Dei ducuntur, ij filij Dei sunt, ibidem Rom. 8. 14.

10. Porro, quanquam idem D. Paulus 2. Cor. 3. 8. prima fronte nonnihil à nostris his assertionibus recedere videtur, dum solam legem, non item Euangelium, vocat mortis ministerium, immò clarè prædicationem Euangelij nominat ministerium Spiritus, non tamen reuera, si rectè, distincteq̃ illic intellectus fuerit Apostolus, ab hac nostra sententia vel ad latum vnguem discrepare comperietur.

11. Quod enim lex quidem rectè vocetur littera, mortisq̃ ministerium, nemo dubitare potest: quia, dum ea sola, sine gratiæ patefactione, prædicatur, carnalis auditor ex ea nequaquam viuificatur, vt suis humanis viribus eam, iuxta Dei mentem, nempe iuxta Spiritum, & veritatem, præstare queat, sed magis inde sibi mortem aeternam deberi, cum desperatione certa, statuere cogitur.

12. Nec obstat huic sententiæ, quod (Rom. 7. 14.) Paulus idem appellat Legem spiritualement, nam in se, quatenus ex ore Dei prodyt, internisq̃ Sanctorum oculis aspectatur

tur, etiam hæc reuera non spiritualis modò, sed & Spiritus, & vita est: at nihilominus, vt à profanis, quibus nulla Spiritus lux affulget, ea percipitur, omninò frigida tantum, & inefficax est littera, nihilq; præter mortem, & condemnationem, citra Christi Spiritum, operari potest.

13. Euangelium autem Apostolus nominat ministerium Spiritus, non, quòd omnibus, quibus prædicatur, etiam profanis & incredulis, necessario Spiritum sanctum, & vitam æternam conferat (imò talibus non minus, quàm Lex, etiam ipsum est mera littera) sed, quia lege pauesactis, & esurientibus hoc gratiam annunciat, & in Christo iusticiam offert, certòq; credentibus addicit, adest ei Deus ex misericordia, donansq; Spiritum sanctum, & operans fidem, efficit, vt in conuersis, contritisq; eorum animis iam omninò Spiritus, & vita reddatur.

14. Hæc litteræ, Spiritusq; significatio primaria est, quam & sacra Scriptura pluribus locis agnoscit, adeoq; diligentissimè nobis esse commendatam oportet. Eam enim si non tantum intellexerimus, verum & in omnibus cum nostris, tum aliorum actionibus, tanquàm certam iudicij normam, adhibuerimus, optimè discrimen inter veram, & falsam pietatem, interq; oues, & hircos, peruiderimus.

15. Cæterum, præter hanc, à sanctis Patribus etiam alia *secundaria a Esch.* Litteræ, Spiritusq; celebratur appellatio, dum in plerisq; ceremonijs, & historijs, alijsq; scripturis nonnullis illi sensum externum, & ferè de corporeis rebus agentem iuxta Gramaticam verborum ordinationem, vocant litteram: arcanum autem, & allegoricum (qui, sub hoc latens, notis quibusdam à sanctis

sanctis, doctisq; diuinitus hominibus de spiritualibus rebus loqui colligitur) nominant Spiritum.

16. Neq; nos hunc exponendæ Scripturæ sacræ modum temerè damnandum, sed, ad veram animi pietatem promouendam, Ecclesiæ perutilem existimamus, dum tamen sapienter, & à solis ijs fit, quibus veritas æterna, mensq; diuina plenius aliquanto iam antea perspecta est: quoniam & vmbra nulla planè cognosci queunt ab interpretibus, antequam de his id, quod in illis adumbratum, seu prædelineatum est, earum vtpote veritas, & quasi corpus, innotuit.

17. Quanquàm igitur & nos ingenuè fatemur, ab Origene, similibusq; Scriptoribus veteribus pariter, & recentibus ἀλλοτριῶς expofita esse multa, quæ non probamus, nihilominus ea, quæ D. Paulus, alijq; similiter à Spiritu sancto docti sic exponunt, omninò iuxta Dei mentem, & voluntatem exponi, paremque cum Scripturis reliquis auctoritatem habere, iudicamus.

18. Atq; hæc etiam Spiritum appellari, libenter patimur, tametsi non appellentur ita propriè (quasi videlicet à profanis minùs, quàm ceteræ doctrinæ, quas litteræ nominauimus, addisci queant, adeoque semper, cognita, spiritus & vita necessariò censerì debeant) sed κατὰ χεῖρας, quia scilicet ad indolem Dei, qui Spiritus est, eiusq; mentem spiritualem, ac diuinam aliquanto propius, quàm aliæ de corporeis rebus explicationes, accedunt.

19. Sicut enim D E V S in essentia sua nobis inuisibilis, per Filium ipsius vnigenitum, hominem factum, cognoscendus, & videndus proponitur, quanquam non videndus, vt ab incredulis

credulis Iudeis, qui crucifixerunt eum, sed oculis fidei, qua mens, indoles, & bonitas eius cognoscitur, & acceptatur: ita verbum quoque eius in se longè nostrum excedens intellectū, ut cognosceretur à nobis, ad captum nostrum prorsus accommodari debuit: non tamen antea verè cognoscitur, quàm, intellectu nostro mortificato, mentem eius nouis auribus in Spiritu Christi percipimus.

20. Ideò *DEVS*, ut indicaret, intellectus nostri mortificationem hanc nobis esse necessariam ad percipiendam veram Scripturæ diuinitus inspiratæ mentem, *vti ferè parabolis*, & ita cum loqui, tum agere nobiscum voluit, ut initio statim à rudibus, & carnalibus intelligi, citra *DEI* Spiritum, & illuminationem, haud posset. *Mat. 13. 11.*

21. Hoc ipsum ipse quoque de se pluribus locis attestatur, ut cum ait *Psal. 78: Aperiam in parabolis os meum. Et Matth. 13: Hæc omnia turbis loquebatur Iesus in parabolis, & sine parabolis non loquebatur eis. Item ad Apostolos, Iohan. 16: Hactenus in parabolis locutus sum vobis. Ita Marc. 4: Vobis datum est nosse mysteria Regni Dei, sed illis, qui sunt foris, in parabolis omnia fiunt, ut videntes videant, & non cognoscant, audientesque audiant, & non intelligant. Sic & Apostolus, 1. Cor. 13: Videmus nunc per speculum in enigmate. &c.*

22. Sed econtra dicit Dominus, *Marc. 4. Nihil tam opertum esse, quod non aliquando reuelandum sit. Vnde ijs, quæ modo citauimus ex Iohannis cap. 16: Hactenus in parabolis locutus sum vobis, adijcit mox & hæc: Tempus veniet, quò non ampliùs in parabolis vobis loquar, sed*
annun-

palam de patre meo annuntiabo vobis. Item ibidem paulo prius de doctrina Spiritus: ille, inquit, me clarificabit. Item: de meo accipiet, & annuntiabit vobis, &c.

23. Tum non amplius velum illud faciei Moſis obuolutum in lectione ſacræ Scripturæ, nobis ad Dominum, eiſq; Spiritum, & veritatem conuerſis, obſtare poterit, quò minùs genuina claritas illius, in carnali noſtro ſenſu teſta priùs, hinc omninò pateſcat, citraq; ullum impedimentum, ubiq; nuda facies, & mens eiſus carni mortuis in conſpectum veniat: vt latiùs docet Apoſtolus. 2. Cor. 3.

24. Huc itaq; nunc aures noſtras in ſancto mortificationis arcana ſtudio demittere debemus, vt nimirum ex verbo Dei, quod ſpiritus, & vita eſt, omninò ſpiritualement, & cœleſtem percipiamus intellectum: Deumq; opt. max. orare debemus noctes, ac dies, vt ad hanc ſapientiam diuinam ſpiritu ſuo nos perducere, docereq; & promouere quàm primùm dignetur.

25. Maximè, ne vel ſummam nobis à ſe pateſactam ſcientiam in profana vita litteram occidentem eſſe ſinat, quæ tum, iuxta Pauli phraſin, inflaret, & non edificaret: ſed vt Spiritum ſuum in ea verè nobis accendat, vtq; ipſe, per eundem illum Spiritum ſuum in nobis, pateſacta genuina verbi ſui mente, viuatur, operetur, & regnet, omnemq; voluntatem ſuam perficiat, ad æternam ſui nominis gloriam, noſtramq; omnium ſalutem, Amen. Quæſtio:

1. An ſine littera cuiquam ad Spiritum ſit acceſſus?
2. An ſaluti ſint propiores, qui conſenuerunt in ſcientia, fiduciaq; litteræ, quàm qui litteram prorsus ignorant?
3. An eorum, qui Scripturam in Eccleſia ſine corruptelis explicant, aliq; docere litteram occidentem, aliq; Spiritum viuificantem rectè dicantur.

F I N I S.

aulo
abit.

olus
iusq
inūs
rius,
nu
niat:

ionis
Dei,
stem
debes
spiri
mum

scien
, quæ
sed ut
r eun
verbi
tatem
tramq

ntia,
orant
ruptelis
m, aliq

